

حرام عليكى

لإمتى هفضل أديكى من عمرى
ومفیش مرة واحدة تدينى
وأنا فيكى كتير مطحون
وضهرى كمان مكسور
بزيادة ياست الحور.
ومن عطفك إسقينى
مُشتاق لطاقة نور
دمى بقى مهدور
ونشفت دموع عينى
كان نفسى أكون مستور
والله ما أنا مغرور
حني بقى وإرحمينى
بحبك لكن معذور
وبُحبك بقيت مغمور
إمتى تواسينى
كيانى بقى مهجور

وبقالى والله دهور
محتاجلك تداوينى
وأنا زارع ليكى زهور
وعيونك خلتها بدور
وانتى جامدة ومـ تلينى
مغميانى بلف وأدور
وهمومى والله بحور
بقيت بيكى مش مسحور
ماهى نارك بتكوينى
إمتى بقى. فيك هاتحينى
وبتقولى أحضانك جنه
لو هى دى جنتك ؟
ياريت من الجنه ترمينى